

yrer manigerley gestalt / inn welchen sy erscheinen sein / haben in  
auch manigerley namen geben.

Vnd wie wol merer tayl der Cometē / sonderlich Welch auß  
natürlicher vrsach kumen / sich bewegen mit dem lauff des ober  
sten hymel / in 24. stunden gerings vmb das erdrich / vñ nichts  
desterweniger das gestirn für vñ für übersich zeucht andre ma  
tery / so kumpt der Comet in 24. stunden wyder über das orth /  
da die matery übersich wirt zogen / vnd also durch die krafft der  
gestirn alles zu samen auff einen hauffen gepracht vnd versam  
let wirt / Darumb es auch gar selten geschicht / das mehr recht  
Cometen dan einer gleich zu einer zeyt erscheinen / vnd wie wol  
zu zeyten geschicht das mer solch stern erscheinen auff ein mal  
vnd zu einer zeyt / sein aber nit recht Cometen / dan sy nicht als  
lang wern / als ein rechter Comet wern sol.

Das aber der recht Comet erscheint wie ein runder stern / ge  
schicht nit / darum dz sein Körper also gleich rund wäre / Son  
der es geschicht das er also rund gesehen wirt / von wegen der  
grossen höch vnd weyt / als wen wir ein fewz sehen von fern /  
oder ein liecht das sunst in der nahent lenglecht / vnd nit rund  
gesehen wirt / in der fern erscheint dasselbig / als ein runde prin  
nende Kugel / vñ alles liecht in die fern oder weyt / erscheint als  
es rund wäre / ist die vrsach das die krafft des gesichts / sein maß  
hat in der weyt oder höch / damit es die recht groß vnd gestalt  
auß nemen mag / wo ein ding über die recht weyt gesehen wirt /  
so wirt es ye weyter ye klainer gesehen / vnd ye klainer ein Kör  
per gesehen wirt / ye baß vergleicht es sich mit der runden ge  
stalt / Dann die natur des augß ist / wens nicht mag begreyffen  
die recht figur vnd groß ( das geschicht wenn ein ding weyter  
vnd höher ist / dann die recht maß des augß außnemen kan ) so  
formiert ein figur die im selber gleich ist / das ist die rund fi  
gur / Also thut auch mit den mitteln farben / wo es von wegen  
der weyt die selbigen nit recht kan außnemen / formirt das aug  
sein aygne farb dz ist plöblet / Darum auch die perg von fern  
gesehen als sy plab wern erscheinen / so sy doch nit plab sein.